

四庫全書薈要

• 乾隆御覽本

經部

欽定四庫全書薈要

經部  
春秋傳

諸國興廢說綱領  
提要卷一至三



春秋傳篇目

諸國興廢說

綱領

提要

第一卷

隱公  
元年之三年

第二卷

隱公四年之七年

第三卷

隱公八年之十一年

第四卷

桓公元年之四年

第五卷

桓公五年之十年

第六卷

桓公  
十一年之十八年

第七卷

莊公  
元年之八年

第八卷

莊公  
九年之十九年

第九卷

莊公  
二十年之三十二年

第十卷

閔公 元年之二

第十一卷

僖公 元年之十一年

第十二卷

僖公 十二年之二十六年

第十三卷

僖公 二十七年之三十二年

第十四卷

文公 元年之八年

第十五卷

文公 九年之十八年

第十六卷

宣公 元年之七年

第十七卷

宣公 八年之十一年

第十八卷

宣公十二年之十八年

第十九卷

成公元年之七年

第二十卷

成公八年之十八年

第二十一卷

襄公元年之十一年

第二十二卷



襄公 十二年之二十六年

第二十三卷

襄公 二十七年之三十二年

第二十四卷

昭公 元年之十二年

第二十五卷

昭公 十三年之二十一年

第二十六卷

昭公 二十二年之三十二年

第二十七卷

定公 元年之九年

第二十八卷

定公 十年之十五年

第二十九卷

哀公 元年之七年

第三十卷

哀公八年之十四年

臣等謹按春秋傳三十卷宋胡安國撰安國  
字康侯建寧崇安人登紹聖四年進士第哲  
宗善其對策親擢為第三人歷官寶文閣直  
學士卒謚文定是書其提舉江州太平觀時  
被詔撰進者也春秋之學或屈經從傳或舍  
傳求經人各異師莫能別白自朱子病是經  
之難通教學者以姑從胡氏之說至明初遂

得立於學官用以試士然夏時冠周月之說  
見斥於朱子而說元年以為體元立極黃仲  
炎尤譏之我

聖祖仁皇帝欽定傳說彙纂於其說既多所駁正逮  
我

皇上御製日講解義序謂其雖著功令終不足以  
服學者之心則安國之論定而千古說春秋  
家之論亦定矣特以其義本公穀而又採取

孟子莊周董仲舒王通邵張二程子之說以  
潤色其文持議博瞻亦可為非聖無法之徒  
目為斷爛朝報者痛下針砭故得久而不廢  
焉安國傳外別有議論條例證據史傳之文  
二百餘章其子寧輯為通旨一書今未見流  
傳吳萊後序謂欲觀正傳必先求之通旨則  
其說亦可知矣乾隆四十年五月恭校上

總纂官臣紀昀臣陸錫熊臣孫士毅

總校官臣陸費墀

春秋傳序

古者列國各有史官掌記時事春秋魯史爾仲尼就加  
筆削乃史外傳心之要典也而孟氏發明宗旨目為天  
子之事者周道衰微乾綱解紐亂臣賊子接迹當世人  
欲肆而天理滅矣仲尼天理之所在不以為已任而誰  
可五典弗惇已所當敘五禮弗庸已所當秩五服弗章  
已所當命五刑弗用已所當討故曰文王既没文不在

茲乎天之將喪斯文也後死者不得與於斯文也天之  
未喪斯文也匡人其如予何聖人以天自處斯文之興  
喪在已而由人乎哉故曰我欲載之空言不如見諸行  
事之深切著明也空言獨能載其理行事然後見其用  
是故假魯史以寓王法撥亂世反之正敘先後之倫而  
典自此可惇秩上下之分而禮自此可庸有德者必褒  
而善自此可勸有罪者必貶而惡自此可懲其志存乎  
經世其功配於抑洪水膺戎狄放龍蛇驅虎豹其大要



則皆天子之事也故曰知我者其惟春秋乎罪我者其  
惟春秋乎知孔子者謂此書之作遏人欲於橫流存天  
理於既滅為後世慮至深遠也罪孔子者謂無其位而  
託二百四十二年南面之權使亂臣賊子禁其欲而不  
得肆則戚矣是故春秋見諸行事非空言比也公好惡  
則發乎詩之情酌古今則貫乎書之事興常典則體乎  
禮之經本忠恕則導乎樂之和著權制則盡乎易之變  
百王之法度萬世之準繩皆在此書故君子以謂五經

之有春秋猶法律之有斷例也學是經者信窮理之要  
矣不學是經而處大事決大疑能不惑者鮮矣自先聖  
門人以文學名科如游夏尚不能贊一辭蓋立義之精  
如此去聖既遠欲因遺經窺測聖人之用豈易能乎然  
世有先後人心之所同然一爾苟得其所同然者雖越  
宇宙若見聖人親炙之也而春秋之權度在我矣近世  
推隆王氏新說按為國是獨於春秋貢舉不以取士庠  
序不以設官經筵不以進讀斷國論者無所折衷天下

不知所適人欲日長天理日消其效使吳楚僭王莫之  
遏也噫至此極矣仲尼親手筆削撥亂反正之書亦可  
以行矣天縱聖學崇信是經乃於斯時奉承詔旨輒不  
自揆謹述所聞為之說以獻雖微辭奧義或未貫通然  
尊君父討亂賊闢邪說正人心用夏變夷大法略具庶  
幾聖王經世之志小有補云

按宋鑑胡安國崇安人紹聖中進士擢太學博士靖  
康初除太常少卿起居舍人皆辭高宗時以張浚薦  
除中書舍人兼侍講先獻時政論二十一篇尋以疾  
求去留兼侍讀專講春秋累官至給事中謝良佐嘗

稱其如大冬嚴雪百草萎死而松栢獨秀  
所著有春秋傳卒諡文定從祀孔子廟庭

# 春秋傳諸國興廢說

周

黃帝之苗裔姬姓后稷之後也后稷封於邰及夏之衰后稷之子不窋失其官竄於西戎至太王為狄所

逼去邰居岐文王受命武王克商而王有天下幽王為犬戎所殺平王遷都王城今河南縣是也平王四

十九年魯隱公之元年也敬王又遷成周今洛陽是也敬王三十九年獲麟之歲也四十四年敬王崩

魯

姬姓侯爵出自周文王第四子周公旦旦佐文武成王有大勲勞於天下成王命為太宰食邑扶風雍縣

東北之周城號宰周公留相天子主自陝以東諸侯乃封其長子伯禽於曲阜地方七百里分以寶玉大弓而俾侯于魯以輔周室伯禽父為魯公子考公酋首六世孫曰惠公弗皇惠公生隱公息姑隱公之元

年當平王四十有九年而春秋始作其後二百四十有二年是哀公將之十四年西狩獲麟其後九君二百三十三年而頃公雖為楚考烈王所滅遷為家人

齊

姜姓侯爵出自炎帝裔孫伯夷為四岳佐禹平水土有功賜姓曰姜氏曰呂謂之呂侯其國在南陽宛縣之西商末太公呂望起漁釣為周文武師號師尚父佐文武定天下以功封營丘為齊侯得征五侯九伯其後桓公小白能相管仲為五霸長天下賴之自僖公祿父之九年魯隱公立至簡公四年西狩獲麟其後三君一百單二年康公卒呂氏絕其祀田氏卒有齊國

晉

姬姓侯爵出自周武王少子唐叔虞成王母弟也初邑姜方娠有吉夢及生子有文在其手曰虞字子干成王滅唐翦桐葉為圭與叔虞戲曰以此封若大臣史佚等以天子無戲言請擇日而成之遂封叔虞於

唐居古大夏實沈之虛參之分野謂之太原亦曰晉陽在河汾之東北地方百里而都於翼平陽絳邑縣東翼城是也唐叔子燮父為晉侯其數世孫文公重耳霸諸侯其子孫為中國盟主者百五十餘年姬姓唯晉為霸主王室賴之自鄂侯二年魯隱公即位春秋作至定公午三十一年西狩獲麟又六世其臣韓魏趙氏三分晉地遷其君為家人

衛

姬姓侯爵出自周武王同母少弟封為成王太司寇食采於康謂之康叔成王誅武庚滅三監中分其地以其半立康叔封為衛伯分以大路綯棧旃旌大呂之樂命以康誥而封於商虛其地汲郡朝歌縣是也其數世孫桓公完之十三年魯隱公即位春秋作出公十二年西狩獲麟後十一世聲公之子成侯速復降爵為侯速孫嗣君更貶號曰君而止有濮陽之地後六世而秦二世廢其君為庶人

鄭

姬姓伯爵出自周厲王少子友宣王母弟也宣王二十二年封友於鄭在滎陽宛陵西南密邇王畿秦京兆漢華陰之鄭縣是也幽王之難友寄帑於虢鄩之間因取二國地前華後河而食溱洧在濟西洛東河南潁北四水間謂之新鄭友卒諡桓公友相幽王其子武公掘突孫莊公寤生皆相平王為司徒者三世莊公二十二年魯隱公即位春秋作聲公二十年西狩獲麟後一百四年韓哀侯滅其國

宋

子姓公爵周二王後出自商王帝乙之長庶子啓食采於微謂之微子紂為不道微子抱祭器以奔周武王誅紂立其子武庚武庚以三監畔成王誅之中分其地封微子為宋公以奉湯祀禮樂車服悉如商舊作賓王家其地應天府睢陽是也其後數世孫穆公和之七年魯隱公立景公三十六年西狩獲麟後六世二百七年而齊魏楚共滅其國



杞

姒姓伯爵周二王後武王克商求夏禹苗裔得東樓公封杞以奉禹祀其地今開封府之雍丘是也東樓公四傳而至武公武公十一年魯隱公立後嘗遷都緣陵又遷淳于淳于蓋古之州國至閔公維之六年西狩獲麟後三十二年而國滅於楚

陳

妫姓侯爵周三恪之國出自帝舜之後封於有虞虞幕裔孫閔父為周武王陶正能利器用王賴之以元女大姬下嫁其子滿而封諸陳使奉虞帝祀其地在太皞之墟今陳縣是也滿諡胡公生申公犀犀而下傳國十世至桓公鮑鮑二十三年魯隱公立閔公二十一年西狩獲麟後三年楚惠王使公孫朝滅之姒姓子爵出自周太王長子太伯與其弟仲雍避少弟季歷賢而有聖子去之荆蠻號曰句吳端委以治周禮荆蠻義之歸者千餘家為吳太伯太伯卒仲雍嗣立斷髮文身羸以為飾遂不通中華後十七世當

吳

春秋魯成公六年其後閻廬之子夫差以強暴霸中國夫差十五年春秋終後八年為越句踐所滅

楚

芊姓子爵出自顓帝孫重黎為高辛氏火正能光融天下命曰祝融其弟吳回嗣為祝融生陸終陸終生

六子皆剖折而產最少者季連季連之苗裔熊為周文武師成王時舉文王武王勤勞之後嗣得鬻熊曾孫熊繹封於荊蠻眡以子男之田其地居丹陽南郡枝江縣是也其後都郢更名曰楚至五世而熊通自立為楚武王武王十九年魯隱公立惠王章八年西狩獲麟其後六國與秦號七雄而楚最盛惠王而下有簡聲悼肅宣威懷頃襄考烈幽哀負芻十二王而後秦滅之

許

姜姓男爵出自堯四岳伯夷之後周武王封其苗裔文叔於許以續太岳之嗣地在潁川許昌縣今許州是也春秋時國小而近鄭鄭再滅之以為俘邑後附楚楚遷之于城父又遷之于白羽又遷之于葉元公

子結之元年  
西狩獲麟

秦

嬴姓伯爵出自顓帝裔孫女脩子大業生大費與禹  
平水土佐舜調馴鳥獸賜姓嬴是為柏翳柏翳十九  
世非子為周孝王主馬汧渭閒馬大蕃息孝王分為  
附庸而邑之秦使續氏嬴號曰秦嬴天水隴西縣秦  
亭是也其後文公四十四年魯隱公立至悼公十年  
西狩獲麟後九世孝公用商鞅以耕戰霸秦其子惠  
文君自號為王至始皇并天  
下自立為皇帝至二世而亡

蔡

姬姓侯爵出自周文王子叔度武王克商封於蔡其  
地蔡州上蔡縣是也自叔度至蔡伯荒荒八世孫考  
父立為宣侯宣侯二十八年魯隱公立成  
侯十年西狩獲麟後三十四年而楚滅之

曹

姬姓伯爵出自文王子叔振鐸武王克商封之其地  
濟陰定陶縣是也叔振鐸生太伯脾脾後九世桓公

終生即位終生三十五年魯隱公  
立至哀公八年曹伯陽為宋所滅

北燕

姬姓伯爵出自周同姓功臣曰君奭佐文武定天下有大功為周太保食邑於召謂之召康公相成

王主自陝以西諸侯封其子為北燕伯其地幽州薊縣是也召公九世至燕惠侯六世孫穆侯之七年魯

隱即位獻公十二年西狩獲麟後六世易王立傳王號者六世至燕王喜坐太子丹事為秦所破滅

莒

嬴姓子爵出自少昊之後武王封茲與期於莒城陽莒縣是也莒夷君無諡而有號曰茲與期十一世而

茲平始見於春秋共公庚與而下微不復見後四世而楚滅之

紀

姜姓侯爵出自東莞劇縣春秋時嘗娶魯女又女為王后魯莊公之三年齊侵之紀季以鄆入于齊四年

紀侯大

去其國

邾曹姓子爵出自陸終第五子晏安之後武王克商封其苗裔曹挾于邾為附庸今魯國鄒縣是也魯隱公

之元年邾儀父克會盟于蔑其後數從齊侯小白尊周進爵為子克後九世桓公革之二十九年西狩獲

麟邾近魯而小

後為楚所并

小邾

曹姓子爵出自邾挾之後夷父顏有功於周周封其子友於邾為附庸春秋時邾黎來始朝魯其地

在東海昌慮縣東北邾城是也齊小白霸邾君附從進爵為子始列諸侯謂之小邾子

虞

姬姓公爵出自太王子仲雍生李簡李簡生叔達叔達生周章虞仲及武王克商求太伯仲雍之後得周

章已為吳君別封其弟虞仲於周之北故夏墟在河東太陽縣自虞仲列為諸侯十二世有虞公者貪而

無謀晉獻公用荀息計

賂以璧馬而取其國

虢

姬姓公爵出自王季子虢仲文王弟也仲與虢叔為王卿士勲在王室藏於盟府而文王友愛二弟謂之

二虢武王克商封仲於弘農陝縣東南之虢城周室東遷虢公忌父虢公林父猶為天子之相魯僖公五

年晉獻公假道於虞以伐虢滅之地入于晉

滕

姬姓侯爵文王子叔繡之後也至宣公十七世乃見春秋後六世齊滅之

薛

任姓侯爵黃帝之後奚仲封于薛至獻侯始來朝魯與諸侯盟會

春秋傳綱領

胡氏曰學春秋者必知綱領然後衆目有條而不繁自  
孟軻氏而下發明綱領者凡七家今載七家精要之  
詞于卷首智者即詞以觀義則思過半矣

孟軻氏曰春秋天子之事也昔者禹抑洪水而天下平  
周公膺戎狄驅猛獸而百姓寧孔子成春秋而亂臣  
賊子懼又曰王者之迹熄而詩亡詩亡然後春秋作

晉之乘楚之檇杭魯之春秋一也其事則齊桓晉文  
其文則史其義則丘竊取之矣又曰春秋無義戰彼  
善於此則有之矣征者上伐下也敵國不相征也

莊周曰春秋經世先王之志也聖人議而不辯又曰春

秋以道名分

按史記周戰國蒙人嘗為蒙漆園吏其學無所不闢楚威王聞其賢遣使厚幣

迎之周曰千金重利卿相尊位也子獨不見犧牛乎我寧遊戲以快吾志焉著書十餘萬言猖狂自恣雖當世宿學不能自解免也

漢董仲舒記夫子之言曰我欲載之空言不如見之於



行事之深切著明也誦其師說曰撥亂世反之正莫  
近春秋其自言曰有國者不可以不知春秋前有讒  
而不見後有賊而不知為人臣者不可以不知春秋  
守經事而不知其宜遭變事而不知其權為人君父  
而不通春秋之義者必蒙首惡之名為人臣子而不  
通春秋之義者必陷篡弑之罪故春秋禮義之大宗  
也按漢書董仲舒廣川人少治春秋下帷講授三年  
不窺園圃以賢良對策勸武帝勉強學問行道設  
誠於內等語帝嘉之以為江都相仲舒學有  
源委正誼明道之言度越諸子為漢醇儒

隋王通曰春秋之於王道是輕重之權衡曲直之繩墨

也舍則無所取衷矣又曰春秋其以天道終乎故止

於獲麟

按隋書王通字仲淹龍門人幼篤學慨然有濟蒼生之志詣長安奏太平十二策不見用

退居河汾教授倣古作經又為中說以擬論語大業初徵不至及卒門人謚曰文中子

宋西都邵雍曰春秋孔子之刑書也功過不相掩五伯者功之首罪之魁也先定五伯之功過而學春秋則大義立矣春秋之間有功者未有大於四國者也有過者亦未有大於四國者也不先治四國之功過則

事無統理不得聖人之心矣

按宋鑑邵雍字堯夫其先范陽人雍游河南因

葬其親伊水上遂家焉受學李之才採蹟索隱遂衍先天之旨尤精於數學著書十餘萬言富弼司馬光呂公著二程子雅敬雍為市園宅自名其居曰安樂窩春秋時乘小車出遊城中賢者悅其德不肖者服其化舉遺士補潁州團練推官不就卒諡康節

橫渠張載曰春秋之書在古無有乃仲尼所自作惟孟

子為能知之非理明義精殆未可學先儒未及此而

治之故其說多鑿

按宋鑑張載字子厚邵州人舉進士為邠州司法歷渭州僉判召為崇

文殿校書同知太常禮院為人志氣不羣初喜談兵及釋老書反而求之六經既見二程子盡棄異學而

學焉神宗立召問治道首以復三代為對與執政不合告歸居橫渠鎮日危坐一室潛心精思教人以禮聞西之士翕然宗之所著有東銘西銘正蒙擴聖賢所未發卒諡曰明淳祐初封鄆伯從祀孔廟

河南程頤曰五經載道之文春秋聖人之用五經之有春秋猶法律之有斷例也又曰五經如藥方春秋猶用藥治病聖人之用全在此書又曰春秋一句即一事是非便見於此乃窮理之要學者只觀春秋亦可以盡道矣又曰春秋傳為按經為斷又曰春秋之文一一意在示人如土功之事無大小莫不書之其意

止欲人君重民力也又曰春秋之法極謹嚴中國而  
用夷禮則夷之韓子之言深得其旨



春秋傳提要

周十二王

春秋歷十四王悼王立未踰年  
敬王崩在春秋後故曰十二王

平王

四十九年隱元年也三  
年崩在位五十一年

桓王

元年隱四年也桓十五  
年崩在位二十三年

莊王

元年桓十六年也莊十  
二年崩在位十五年

僖王

元年莊十三年也十  
七年崩在位五年

惠王

元年莊十八年也僖八  
年崩在位二十五年

襄王

元年僖九年也文八年崩在位三十三年

頃王

元年文九年也十四年崩在位六年

匡王

元年文十五年也宣二年崩在位六年

定王

元年宣三年也成五年崩在位二十一年

簡王

元年成六年也襄元年崩在位十四年

靈王

元年襄二年也二十八年崩在位二十七年

景王

元年襄二十九年也昭二十二年崩在位二十五年

敬王

元年昭二十三年也崩在春秋後



列國見於年表者十九

魯蔡曹衛滕晉鄭齊秦楚宋杞陳吳邾莒薛許小邾

魯十二公

隱公

即位不書

桓公

四年七年去秋冬二時

莊公

即位不書

閔公

即位不書

僖公

即位不書

文公

宣公

成公

襄公

昭公

定公

元年無正月

哀公

五伯

春秋終入吳黃池之役吳越亦爭伯矣

齊桓公

莊十三年會北杏

宋襄公

僖十九年盟曹南

晉文公

僖二十八年戰城濮

秦穆公

文三年伐晉

楚莊王

宣十一年盟辰陵

晉十一世

文公

僖二十八年立三十二年卒

襄公

僖三十三年立文六年卒

靈公

文七年立宣二年卒

成公

宣三年立宣九年卒

景公

宣九年冬立成十年卒

厲公

成十一年立十八年卒

悼公

成十八年立  
襄十五年卒

平公

襄十六年立  
昭十年卒

昭公

昭十一年立  
十六年卒

頃公

昭十七年立  
三十年卒

定公

昭三十年立  
卒在春秋後

魯三桓

仲孫氏

又曰  
孟孫

叔孫氏

季孫氏

晉八卿

智瑩

士匄

荀偃

韓起

欒黶

士魴

魏絳

趙武

晉六卿

三卿在春秋後不載

趙氏 范氏 智氏 荀氏 魏氏 韓氏

周來聘七

隱七年凡伯 九年南季

桓四年宰渠伯糾 五年仍叔之子

八年家父 僖三十年宰周公

宣十年王季子

周錫命三

莊元年榮叔 文元年毛伯 成八年召伯

周歸賑一

定十四年石尚

周賵葬四

隱元年宰咺 文元年叔服

五年榮叔召伯

周來求三

隱三年武氏子求賻 桓十五年家父求車

文九年毛伯求金

魯君臣朝聘于周八

文九叔孫得臣昭廿二叔鞅會葬故不數

僖二十八年公兩朝王所

成十三年公如京師 僖三十年公子遂

文元年叔孫得臣 八年公孫敖

宣九年仲孫蔑 襄二十四年叔孫豹

公如齊十有一

春秋公如齊者十有五桓莊四如齊非朝故不數

僖公三

宣公六

昭公二

公如晉二十

文公二

成公四

襄公五

昭公八

定公一

公如楚二

襄公一

昭公一

魯大夫聘列國五十有六

又如齊四如宋三如晉二如陳滕各一皆因事

而往非專行聘禮故不數

如齊十有九

如晉二十有五

如陳二

如宋五

如牟如衛如楚如莒如邾各一

諸國朝魯四十

曹滕小邾各五

杞邾各七

郟二

薛紀穀鄧郕邾葛牟蕭各一

齊聘魯五

隱七年弟年

桓三年弟年

僖三十三年國歸父

宣十年國佐



襄二十七年慶封

晉聘魯十有一

成三年荀庚

八年士燮

十一年卻犢

十八年士匄

襄元年荀瑩

八年士匄

十二年士魴

二十六年荀吳

二十九年士鞅

昭二年韓起

二十一年士鞅

宋聘魯四

成四年華元

八年華元

襄十五年向戌

昭十二年華定

衛聘魯四

文四年甯俞

成三年孫良夫

襄元年公孫剽

七年孫林父

陳鄭秦吳聘魯各一

莊二十五年陳女叔

文十二年秦術

襄五年鄭公子發 二十九年吳札

楚聘魯三

莊二十三年荆人 文九年椒

襄三十年遂罷

盟一百有九

凡內為主書及外為主書會所以別首從謹善惡之首也

始隱元年蔑 終哀二年句繹

特盟參盟同盟始終

石門于鹹特盟之始終也

瓦屋鄠陵參盟之始終也

于幽平丘同盟之始終也

同盟十有六

齊盟二皆同尊周也晉盟十有四皆同外楚也

兩幽

齊桓

新城

晉靈

清丘

斷道

蟲牢

馬陵

于蒲

晉景

于戚

柯陵

晉屬

虛打

雞澤

于戲

亳城

北

晉悼

重丘

晉平

平丘

晉昭

殊盟二

僖五年首止

九年葵丘

涖盟四

僖三年公子友如齊 文七年公孫敖如莒

昭七年叔孫婁如齊 定十一年叔還如鄭

來盟五

桓十四年鄭弟語 閔二年齊高子

僖四年楚屈完 文十五年宋司馬華孫

宣七年衛孫良夫

外大夫聘而遂盟五

成三年荀庚良夫 十一年卻犢

襄七年林父 十五年向戌

會九十七

始隱二年潛 終哀十三年黃池

殊會四

僖五年首止 成十五年鍾離

襄十年于柎 十四年于向

遇七

內之遇四  
外之遇三

隱四年遇清

莊二十三年遇穀

三十年遇魯濟

僖十四年遇防

隱八年宋衛遇垂

莊四年齊陳鄭遇垂

三十二年宋齊遇梁丘

平五

加宣四年平  
莒及鄭為六

隱六年鄭來輸平

宣十五年宋及楚平

昭七年暨齊平

定十年及齊平

十一年及鄭平

來七

隱元年祭伯來

桓六年寔來

八年祭公來

閔元年齊仲孫來

僖二十九年兩介葛盧來

襄十八年白狄來

人自為盟三

桓十一年惡曹

中國未有伯而人自為盟

僖二十一年鹿上

中國始無伯而人自為盟



宣十二年清丘

中國又將無伯而人自為盟

侵六十

潛師掠境曰侵

始莊十年公侵宋

終哀十三年晉侵衛

伐二百十有三

聲罪致討曰伐

始隱二年鄭伐衛

終哀十三年楚申伐陳

戰二十三

兩兵相接曰戰書敗績者十五又內兵書敗曰戰若僖公升陘諱不書敗惟莊

公乾時之敗以與讎戰不諱

始桓十年戰郎

終哀十一年戰艾陵

圍四十四

縲其城邑曰圍

始隱五年宋圍長葛

終哀七年宋人圍曹

入二十七

造其國都曰入

始隱二年莒入向

終哀十三年越入吳

遷十

徙其朝市曰遷

始莊元年遷邾郕郕

終哀二年遷州來

滅三十

毀其宗廟社稷曰滅內兵書滅曰取若取邾取郕取郕是也唯僖公滅項公在會李

孫滅之故不諱

始莊十年齊滅譚

終定十五年楚滅胡

敗師十有六

說道而勝  
之曰敗

始隱十年公敗宋師于管

終定十四年於越敗吳于槁李

取師三

悉虜而俘  
之曰取

隱十年伐戴取之

哀九年雍丘

十三年于囷

取國邑十有六

胡氏曰取者收奪之名  
趙子曰凡力得之曰取

始隱四年取牟婁

終哀八年取謹闡

襲一

輕行而掩之曰襲

襄二十三年齊侯襲莒

追二

已去而躡之曰追

莊十八年公追戎于濟西

僖二十六年公追齊至鄆弗及

戍三

聚兵而守之曰戍

僖二十八年公子買戍衛

襄五年成陳

十年成鄭虎牢

以一國而用諸侯之師三

以弱假強而能左右之曰以

桓十四年宋以四國伐鄭

僖二十六年魯以楚師伐齊

定四年蔡以吳子伐楚

城二十有九

城者完舊也內城二十三不時害義固為罪矣雖時且義亦書見勞民為

重事也齊伯外城三獨城邢為美晉伯外城三獨成周無譏

始隱七年城中丘

終哀六年城邾瑕

築八

築者創始也

莊元年築王姬之館 二十八年築郿

三十一年三築臺 成十八年築鹿囿

昭九年築郎囿 定十三年築蛇淵囿

執三十有一

齊執者五晉執者十五宋執者三邾執者一楚執者七

始桓十一年宋人執鄭祭仲

終哀四年晉執戎蠻子赤歸于楚

獲六

凡君戰而死者曰滅生禽曰獲大夫生死皆曰獲

僖元年于鄆獲莒拏 十五年于韓獲晉侯

宣二年大棘獲華元 襄八年鄭獲公子燮

昭二十三年雞父獲陳夏徵舒

哀十一年艾陵獲齊國書

降二

降者脅服之詞

莊八年邾降于齊師 三十年齊人降鄆

潰四

民逃其上曰潰

僖四年侵蔡蔡潰 文三年伐沈沈潰

成九年伐莒莒潰 昭二十九年鄆潰

講武二

桓公有所畏而大閱非其時莊公有所侯而治兵非其地

桓六年大閱

簡車馬也

莊八年治兵

習戰也申明軍法以整齊之也

蒐五

中春教振旅遂以蒐謂蒐索擇取不孕者大云者偕天子之制也

昭八年蒐于紅

十一年大蒐比蒲

二十二年大蒐昌間 定十三年大蒐比蒲

十四年大蒐比蒲



狩四

中冬教大閱遂以狩  
謂守取之無所擇也

桓四年于郎

莊四年于禚

僖二十八年河陽

哀十四年獲麟

乞師五

乞者卑遜自屈之辭  
又曰乞不保得之辭

僖二十六年公子遂如楚

成十三年晉卻錡來  
十六年晉欒黶來

十七年晉荀息來  
十八年晉士魴來

次師十有三

齊次者四魯次者四齊衛次者三晉  
楚次者各一伐而書次其次為善救

而書次其次為敗又莊十年次郎見齊伯之難  
文十年次厥貉見楚伯之難襄元年次鄆見晉  
復伯之難

始莊三年公次于滑

終定十五年齊衛次于渠蔭

制楚得失七

召陵以義勝

城濮以威勝

鄆陵以幸勝

蕭魚以善勝

于泓以不度德不量力而敗

于邲以將不用命而敗

召陵以求貨弗得而還

救二十三

始莊六年子突救衛 終哀十年吳救陳

獻捷二

獻者下奉上之  
詞軍獲曰捷

莊三十一年齊來獻戎捷

僖二十一年楚宜申來獻捷

雩二十有一

旱祭也諸侯雩于境內之山川以山川百源能興雲雨也

書秋者七

書七月者二

書八月者四

書九月者七

書冬者一

郊九

龜違者四牛災者四非時大不敬者一郊所以祭天魯諸侯而祭之僭也

僖三十一年四月四卜郊

宣三年正月牛傷乃不郊

成七年正月牛傷不郊

十年四月五卜郊 十七年九月辛丑用郊

襄七年四月三卜郊 十一年四月四卜郊

定十五年正月牛傷五月辛亥郊

哀元年正月牛傷四月辛亥郊

望三

望祭也望于山川

僖三十一年 宣三年 成七年

烝嘗三

冬曰烝衆也謂萬事畢成所薦衆多也秋曰嘗以物成而薦新為義

桓八年春正月己卯烝

夏五月丁丑烝 十四年乙亥嘗

土田十

假一

取五

歸我一

歸之于一

彊一

來歸一

災異一百二十二

日食三十六

星孛三

星隕隕石各一

不雨七

無冰三

大雨震電一

雨雪三

大雨電三

地震五

山崩二

大水九

有年二

大旱二

饑三

無麥苗一

大無麥禾一 隕霜不殺草李梅實一

隕霜殺菽一 雨木冰一 六鷁退飛一

多麋有蜚有蜚螽生各一 螟三 蝻十

牛傷四 牛死二 宮室災六

震廟一 屋壞二 齊大災一

宋衛陳鄭災一 宋陳災各一

齊桓衣裳之會十有一

北杏 兩鄆 兩幽 于櫓 于貫 陽穀 首止

甯母 葵丘

齊桓兵車之會四

于洮 于鹹 牡丘 于淮

晉文五書爵

侵曹 伐衛 入曹 城濮 踐土

晉襄退三強

僖三十三年敗秦于殽 敗狄于箕

伐許

許貳于楚伐許所以離楚也



晉悼五會

雞澤 于戚 救陳 于鄒 邢丘

晉悼三駕

襄十年伐鄭 十一年伐鄭 同年伐鄭

晉平七合諸侯

溴梁 祝柯 澶淵 商任 沙隨 兩夷儀

晉平五合大夫

澶淵 于宋 城杞 澶淵 于虢

春秋五始

元者氣之始

春者四時之始

王者受命之始

正月者政教之始

即位者一國之始

孔子相魯

查歸賑與  
孔子無預

定十年會于夾谷

齊人來歸鄆讎龜陰田

十二年叔孫墮郈

季孫仲孫墮費

子路用魯

定十二年墮郕

墮費

子貢用魯

定十五年邾子來朝 哀七年會吳于鄆

十二年會吳于橐臯 會衛宋于鄆

冉求用魯

哀十一年齊國書伐我

王人三

莊六年子突救衛

僖八年子洮

二十九年翟泉

命大夫三

魯單伯

鄭祭仲

陳女叔

魯三家所始

即三桓也

僖元年公子友敗莒于鄆

是役公賜友汶陽之田及費季氏始

四年公孫茲侵陳

叔孫氏始

十五年公孫敖救徐

孟孫氏始

春秋傳卷一

宋 胡安國 撰

隱公上

公名息姑魯惠公之子姬姓侯爵自周公子伯禽始受封傳世十有三而至隱公攝

主國事謚法不尸其位曰隱

周

文武開基始都豐鎬幽厲板蕩平王東遷洛陽盡舉故都而棄之秦所謂東周也於是王室微弱至平王

四十九年而入春秋魯隱公三年平王崩桓王立

鄭

姬姓伯爵自桓公始受封周厲王之子宣王之弟也傳世武公莊公莊公元年封弟段于京二十二年克

段于鄆  
入春秋音註  
鄆音偃

齊

姜姓侯爵自太公相武王定殷受封于齊受命專征侯伯傳世十三至僖公九年入春秋

宋

子姓公爵周武王定殷邦封微子啟于宋以奉殷祀傳世十四至穆公七年入春秋魯隱公三年穆公卒

弟殤公  
與夷立

晉

姬姓侯爵自唐叔始受封傳世十一而至昭侯昭侯封文侯之弟成師于曲沃晉始亂分為二以翼曲沃

之別

翼

昭侯之後傳孝侯鄂侯鄂侯二年入春秋隱公五年曲沃伐翼翼侯奔隨王命虢公立鄂侯之子光

于翼是為哀侯隱公六年晉逆翼侯于隨納諸鄂謂之鄂侯

曲沃

成師之後傳曲沃莊伯曲沃莊伯之十一年十一月魯隱公之元年正月也蓋用夏正建寅之

月為歲首不惟改元又改歷矣隱公七年  
曲沃莊伯卒子稱代立是為曲沃武公

衛

姬姓侯爵自康叔始受封傳世十三至桓公十三年  
入春秋魯隱公四年衛州吁弑桓公自立冬殺州吁

宣公

晉立

蔡

姬姓侯爵蔡叔之子蔡仲率德改行成王復封于蔡  
傳世十三至宣公二十八年入春秋魯隱公八年宣

公卒子桓  
侯封人立

曹

姬姓伯爵自曹叔振鐸始受封傳世  
十二至桓公終生三十五年入春秋

滕

姬姓侯爵至魯隱公七年見滕音註見去  
侯卒其後稱子蓋為時王所黜聲

陳

姬姓侯爵自胡公始受封傳  
世十二至桓公二十三年入春秋

杞

姒姓侯爵夏商之後自東樓公始受封傳五世至武公二十九年入春秋魯莊公二十七年書杞伯來朝

蓋為時王所黜其後又稱子

薛

任姓侯爵至魯隱公十一年見來朝莊公三十一年見書薛伯卒蓋為時王所黜其後至昭公三十一年見

葬薛

獻公

莒

已姓子爵至魯文公十八年見庶其

邾

曹姓附庸國自儀父入春秋後為子至魯莊公十六年書邾子克卒

許

姜姓太獄之後至魯隱公十一年見許莊公及許叔魯桓公十五年許叔入于許即魯僖公四年許男新

臣卒葬許穆公也



小邾

曹姓顓頊之後魯莊公五年書邾邾來來朝蓋附庸而未爵命其後數從齊桓公尊王室王命為諸

侯至魯僖公七年始書小邾子

音註

數入聲

楚

羊姓子爵自熊繹始受封八世至熊渠立其長子康為句亶王中子紅為鄂王少子執麇為越章王此僭

王之始也又八世至熊儀是為若敖又二世至熊眴是為蚡冒又一世熊通是為楚武王武王十九年入

春秋

秦

嬴姓伯翳顓頊帝之後也殷有蜚廉周有造父周孝王使非子畜馬蕃息分土為附庸邑之秦六世至襄公

將兵救周送平王東遷有功封為諸侯襄公卒文公立文公四十四年是為隱公元年又六世至穆公任

好十五年魯僖公十五年始見春秋

吳

姬姓子爵自大伯作吳五世至周章而武王克殷因封之吳又十四世至壽夢而吳始益大稱王魯成公

七年始

見春秋

越

其先禹之苗裔少康之庶子也封於會稽以奉禹祀後二十餘世至於允常魯昭公五年偕楚伐吳始見

於春秋允常與閭廬戰而相怨伐定公十四年允常卒子句踐立是為越王是年吳伐越越敗之于槁李

孟子曰王者之迹熄而詩亡詩亡然後春秋作今按邶鄘而下多春秋時詩也而謂詩亡然後春秋

作何也自秦離降為國風天下無復有雅而王者之詩亡矣春秋作於隱公適當雅亡之後又按小

雅正月刺幽王詩也而曰赫赫宗周褒姒滅之逮魯孝公之末幽王已為犬戎所斃惠公初年周既

東矣春秋不作於孝公惠公者東遷之始流風遺俗猶有存者鄭武公入為司徒善於其職則猶用

賢也晉侯得王于艱錫之拒壘則猶有誥命也王  
曰其歸視爾師則諸侯猶來朝也義和之薨謚為  
文侯則列國猶有請也及平王在位日久不能自  
強於政治棄其九族為齒有終遠兄弟之刺不撫  
其民周人有東新蒲楚之箴至其晚年失道滋甚  
乃以天王之尊下昭諸侯之妾於是三綱淪九法  
教人望絕矣夫婦人倫之本朝廷風化之原平王  
子母適冢正后親遭褒姒之難廢黜播遷而宗國  
顛覆亦可省矣又不是懲而賄人寵妾是拔本塞  
原自滅之也春秋於此蓋有不得已焉耳託始乎  
隱不亦深切  
音註 復扶又反威胡悅反朝直遙反  
著明也哉 凡後朝廷朝聘並同治去聲齒

力軌反  
遠去聲

巳周平王四  
未十九年 元年

齊僖公祿父九年晉鄂侯郤邲二年曲  
沃莊伯鮮十一年衛桓公完十三年

蔡宣公考父二十八年鄭莊公寤生二十二年曹桓公終生三十五年陳桓公鮑二十三年杞武公二十九年宋穆公和七年秦文公四十四年楚武王熊通十九年

即位之一年必稱元年者明人君之用也大哉乾元萬物資始天之用也至哉坤元萬物資生地之用也成位乎其中則與天地參故體元者人主之職而調元者宰相之事元即仁也仁人心也春秋深明其用當自貴者始故治國先正其心以正朝廷與百官而遠近莫不壹於正矣春秋立文兼述作按舜典紀元日商訓稱元祀此經書元年所謂祖二帝明三王述而不作者也正次王王次春乃立法創制裁自聖心無所迷於人者非

音註  
聲治平

春王正月音註

按隱公之始年周王之正月也書王正月見周之正朔猶行於天下也

按左氏曰王周正月周人以建子為歲首則冬十有一月是也前乎周者以丑為正其書始即位曰惟元祀十有二月則知月不易也後乎周者以亥為正其書始建國曰元年冬十月則知時不易也建子非春亦明矣乃以夏時冠周月何哉聖人語顏回以為邦則曰行夏之時作春秋以經世則曰春王正月此見諸行事之驗也或曰非天子不議禮仲尼有聖德無其位而改正朔可乎曰有是言也不曰春秋天子之事乎以夏時冠月垂法後世以周正紀事示無其位不敢自尊也其旨微矣加王於正者公羊言大一統是也國君逾年改元必行告廟之禮國史主記時政必書即位之事而隱公闕焉是仲尼削之也古者諸侯繼世襲封則內必有所承爵位土田受之天子則上必有所稟內不承國於先君上不稟命於天子諸大夫扳已以立而遂立焉是與爭亂造端而篡弑所由起也春秋首絀隱公以明大法父子君臣之倫正

矣

音註

冠語並去聲扳普  
類反絀與黜同

三月公及邾儀父盟于蔑

音註

蔑魯地邾儀父附庸之  
君未王命也此私盟之

始父  
音甫

魯侯爵而其君稱公此臣子之詞春秋從周之文而  
不革者也我所欲曰及邾者魯之附庸儀父其君之  
字也何以稱字中國之附庸也王朝大夫例稱字列  
國之命大夫例稱字諸侯之兄弟例稱字中國之附  
庸例稱字其常也聖人按是非定褒貶則有例當稱  
字或黜而書名例當稱人或進而書字其變也常者  
道之正變者道之中春秋大義公天下以講信修睦  
為事而刑牲飲血要質鬼神則非所貴也故盟有弗  
獲已者而汲汲欲焉惡隱公之私也  
音註要平聲質  
或言獲其首與公盟而書字失之矣  
音註與罰同

夏五月鄭伯克段于鄆音註

鄆鄭地音偃

用兵大事也必君臣合謀而後動則當稱國命公子  
呂為主帥則當稱將出車二百乘則當稱師三者咸  
無稱焉而專目鄭伯是罪之在伯也猶以為未足又  
書曰克段于鄆克者力勝之詞不稱弟路人也于鄆  
操之為已威矣夫君親無將段將以弟篡兄以臣伐  
君必誅之罪也而莊公特不勝其母焉爾曷為縱釋  
叔段移於莊公舉法若是失輕重哉曰姜氏當武公  
存之時常欲立段矣及公既沒姜以國君嫡母主乎  
內段以寵弟多才居乎外國人又悅而歸之恐其終  
將軋已為後患也故授之大邑而不為之所縱使失  
道以至於亂然後以叛逆討之則國人不敢從姜氏  
不敢主而大叔屬籍當絕不可復居父母之邦此鄭  
伯之志也王政以善養人推其所為使百姓興於仁  
而不偷也況以惡養天倫使陷於罪因以翦之乎春

秋推見至隱首誅其意以正人心示天音註夫音扶  
下為公不可以私亂也垂訓之義大矣音註不勝勝

升音

秋七月天王使宰咺來歸惠公仲子之賵音註

此王室內交諸

侯之始咺音  
恒賵方鳳反

上古應時稱號故其名三變春秋以天自處創制立  
名繫王於天為萬世法其義備矣冢宰稱宰咺者名  
也王朝公卿書官大夫書字上士中士書名下士書  
人咺位六卿之長而名之何也仲子惠公之妾爾以  
天王之尊下賵諸侯之妾是加冠於廢人道之大經  
拂矣天王紀法之宗也六卿紀法之守也議紀法而  
修諸朝廷之上則與聞其謀頒紀法而行諸邦國之  
間則專掌其事而承命以賵諸侯之妾是壞法亂紀



自王朝始也春秋重嫡妾之分故特貶而書名以見宰之非宰也或曰僖公之母成風亦莊公妾也其卒也王使榮叔歸含且賵其葬也至使召伯來會葬下賵諸侯之妾而名其宰榮召何以書字而不名也於前賵仲子則名家宰於後葬

**音註**

壞音恠分去聲含戶暗反

# 九月及宋人盟于宿音註

魯宋宿三國共為盟參盟之端見矣

內稱及外稱人皆微者其地以國宿亦與焉微者盟會不志於春秋此其志者有宿國之君也凡書盟者惡之或曰周官有司盟掌盟載之法詛祝作其詞王府共其器戎右役其事太史藏其約蘇公亦曰出此三物以詛爾斯夫盟以結信出於人情先王猶不禁也而謂凡書盟者惡之可乎曰盟以結信非先王所欲而不禁逮德下衰欲禁之而不克也春秋之時會而歃血其載果掌於司盟猶不以為善也又况私相

要誓慢鬼神犯刑政以成傾危之習哉今魯既及儀父宋人盟矣尋自叛之信安在乎故知凡書盟者惡

之音註

與音預詛側慮反祝支又反共音恭約於妙反

冬十有二月祭伯來音註

此私交之始祭側界反

按左氏曰非王命也祭伯畿內諸侯為王卿士來朝於魯而直書曰來不與其朝也人臣義無私交大夫非君命不越竟所以然者杜朋黨之原為後世事君而有貳心者之明戒也惟此義不行然後有藉外權如繆留之語韓宣惠者交私議論如莊助之結淮南者倚強藩為援以脅制朝廷如唐盧攜之於高駢崔杼之於宣武昭緯之於幽岐者矣經於內臣朝聘告赴皆貶而不與正其本也豈有誣上行私自植其黨哉

之音註

音註

竟音境繆音穆

公子益師卒音註

益師曹大夫

凡公子公孫登名於史冊貴戚之卿也不書官者故侍講程頤以謂不與其以公子故而自為卿也古者諸侯大夫皆命於天子卿卒必書此春秋貴大臣之意其不日公羊以為遠然公子彊遠矣而書日則非遠也穀梁以為惡然公子牙季孫意如惡矣而書日則非惡也左氏以為公不與小斂然公孫敖卒於外而公在內叔孫舍卒於內而公在外不與小斂明矣而書日左氏之說亦非也其見恩數之有厚薄歟庚平王五年齊僖十晉鄂三衛桓十四蔡宣二十四申十年二年鄭莊二十三曹桓三十六陳桓二十四杞武三十宋穆八秦文四十五楚武二十

春公會戎于潛音註

潛魯地戎之近於魯者也此外交之始是故會戎于潛春秋之始會

吳黃池春秋之終始也

我狄舉號外之也天無所不覆地無所不載天子與  
天地參者也春秋天子之事何獨外我狄乎曰戎狄  
之有善否猶君子之有小人內君子外小人為泰內  
小人外君子為否春秋聖人傾否之書內中國而外  
四夷使之各安其所也無不覆載者王德之體內中  
國而外四夷者王道之用是故以諸夏而事戎狄致  
金縢之奉苟圖便安其策不可施也以戎狄而朝諸  
夏或狎主齊盟亂常失序其禮不可行也以羗胡而  
居塞內無出入之防日復一日必將滋蔓萌猾夏之  
階其禍不可長也為此說者其知內外之旨而明於  
馭我之道正朔所不加也矣  
會同之有書會戎譏之也

夏五月莒人入向音註

向小國音餉此入國  
之始傳例弗地曰入

無駭帥師入極音註

極附庸國無駭帥師大夫專兵之端見矣

左氏曰莒子娶於向向姜不安莒而歸莒人入向以姜氏還此所謂按也春秋書曰莒人入向此所謂斷也以事言之入者造其國都以義言之入者逆而不順莒稱人小國也無駭不氏未賜族也其書帥師用大衆也非王命而入人國邑逞其私意見諸侯之臣也擅興而征討不加焉見天王之不君也據事直書義自音註造七見矣到反

秋八月庚辰公及戎盟于唐音註

唐魯地此盟戎之始

按費誓稱淮夷徐戎此蓋徐州之戎久居中國在魯之東郊者也韓愈氏言春秋謹嚴君子以為添得其旨所謂謹嚴者何謹乎莫謹於華戎之辨矣中國而為戎則戎之戎而猾夏則膺之此春秋之旨也而與

戎軼血以約盟非義矣是故成於日者必以事繫日而前此盟于蔑則不日盟于宿則不日後此盟于密則不日盟于石門則不日獨盟于唐而書日者謹之也後世乃有結戎狄以許婚而擇祀不以德如西漢之於匈奴約戎狄以求利而華夏被其毒如肅宗之於回紇信戎狄以與盟而臣主蒙其恥如德宗之於尚結贊雖悔於終亦將奚及

**音註**

費音秘繫音繼被去聲

九月紀履緌來逆女音註

履緌音須左傳作裂

冬十月伯姬歸于紀音註

伯姬曹女裂

按穀梁子逆女親者也使大夫非正也魯哀公問寬而親迎不已重乎孔子對曰合二姓之好以為宗廟社稷主君何謂已重乎文定厥祥親迎于渭造舟為梁不顯其光則世子而親迎也韓侯娶妻蹶父之子

韓侯迎止于蹶之里則諸侯而親迎也有夫婦人倫之本也逆女有父子有父子然後有君臣夫婦人倫之本也逆女必親使大夫非正也入春秋之始名宰咺歸暵以譏亂法書履緌逆女以志變常衆妾之分定矣大昏之禮嚴

音註

好去聲  
蹶音鰕

紀子伯莒子盟于密音註

伯左作帛密莒邑子帛裂繻

子帛盟莒結好以和解  
之此外特相盟之始

凡闕文有斷以大義削之而非闕者有本據舊史因之而不能益者亦有先儒傳授承誤而不敢增者如隱不書即位桓不書王賈葬成風王不書天吳楚之君卒不書葬之類皆斷以大義削之而非闕也甲戌己丑夏五紀子伯莒子盟于密之類或曰本據舊史因之而不能益者也或曰先儒傳授承誤而不敢增

者也闕疑而慎言其餘可矣必曲為之說則鑿矣

十有二月乙卯夫人子氏薨音註

子氏仲子也隱讓桓以為太子故成其母

喪稱夫人以赴于諸侯

按穀梁子曰夫人子氏者隱之妻也卒而不書葬夫人之義從君者也邦君之妻國人稱之曰小君卒則書薨以明齊也先卒則不書葬以明順也有夫婦然後有父子有父子然後有君臣夫婦人倫之本也入春秋之始於子氏書薨不書葬明示大倫苟知其義則夫夫婦婦而家道正矣

鄭人伐衛音註

征伐天子之權此諸侯專征伐之始

按左氏鄭共叔之亂公孫滑出奔衛衛人為之伐鄭取康延至是鄭人伐衛討滑之亂也凡兵聲罪致討



曰伐潛師掠境曰侵兩兵相接曰戰環其城邑曰圍造其國都曰入徙其朝市曰遷毀其宗廟社稷曰滅說道而勝之曰敗悉虜而俘之曰取輕行而掩之曰襲已去而躡之曰追聚兵而守之曰戍以弱假強而能左右之曰以皆誌其事實以明輕重內兵書敗曰戰書滅曰取特婉其辭為君隱也征伐天子之大權今鄭無王命雖有言可執亦王法所禁況於修怨乎不書戰者程氏以為衛已服也衛服則可免矣此義施於伐而不書戰皆可通矣

辛平王五十二年

齊僖十一晉鄂四衛桓十五蔡宣三十鄭莊二十四曹桓三十七陳桓二

十五杞武三十一宋穆九年卒秦文四十六楚武二十一

春王二月己巳日有食之

經書曰食三十六去之十有餘歲而精厯筭者所能考也其行有常度矣然每食必書示後世治厯明時之法也有常度則災而非異矣然每食必書示後世遇災而懼之意也日者衆陽之宗人君之表而有食之災咎象也克謹天戒則雖有其象而無其應弗克畏天災咎之來必矣凡經所書者或妾婦乘其夫或臣子背君父或政權在臣下或夷狄侵中國皆陽微陰盛之證也是故十月之交詩人以刺日有食之春秋必書以戒人君不可忽天象也

三月庚戌天王崩音註

平王崩桓王立

崩者上墜之形春秋歷十有二王桓襄匡簡景志崩志葬者赴告及魯往會之也平惠定靈志崩不志葬者赴告雖及魯不會也莊僖頃崩葬皆不志者王室不告魯亦不往也諸侯為天王服斬衰禮當以所聞

先後而奔喪今平王崩周人來訃而隱公不往是無君也其罪應誅不書而自見矣或曰萬國至衆也封疆至重也天王之喪不得越境以奔而修服於國卿供弔送之禮訖葬卒哭而除喪禮乎按周書康王之誥太保率西方諸侯入應門左畢公率東方諸侯入應門右再拜趨出王反喪服此奔成王之喪者安得以為修服於國而可乎故周人有喪魯人有喪周人往弔謂使人可也魯人不往謂當親之者而不可使人代也諸侯歲時或朝覲於京師或會同於方嶽或從兵革征討之事越境踰時不以為難何獨難於奔喪而薄君臣始終存歿之義哉

**音註**

衰音崔

## 夏四月辛卯尹氏卒

尹氏天子大夫世執朝權為周階亂家父所刺東國之均不平謂何者是也因其告喪與立子朝以朝奔

楚皆以氏書者志世卿非禮為後鑒也或曰世卿非禮裳裳者華何以作乎曰功臣之世世其祿世卿之官嗣其位祿以報功也故其世可延位以尊賢也故其官當擇官不擇人世授之柄黨與既衆威福下移大姦根據而莫除人主孤立而無助國不亡幸爾春秋於周書尹氏武氏仍叔之子於魯書季友仲遂皆志其非禮也公羊子此說必有所受矣

秋武氏子來求賻音註

此來求之始

武氏天子之大夫何以不稱使當喪未君非王命也嗣子定位於初喪其曰未君何也古者君薨諒陰百官總已以聽於冢宰三年夫百官總已以聽則是攝行軍國之事也以非王命而不稱使春秋之旨微矣於以謹天下之通喪而嚴君臣之名分也夫賻以貨財則生者所須索也君取於臣不言求而曰求賻求

車求金皆著天王之失道也上失其道則下不臣矣

# 八月庚辰宋公和卒音註

穆公卒  
殤公立

外諸侯卒國史承告而後書聖人皆存而弗削曷為弗削春秋天子之事也古者諸侯之邦交閒問殷聘而世相朝蓋王事相從則有和好之情及告終易代則有弔恤之禮是諸侯所以睦鄰國也周制王哭諸侯則大宗伯為上相司服為王制總麻宰夫掌邦之弔事戒令與其幣器財用是王者所以懷諸侯也凡諸侯卒皆存弗削而交鄰國待諸侯之義見矣卒而或日或不日者何謹則書日慢則書時其大致然也卒而或名或不名者何會盟則名於載書聘問則名於簡牘未嘗會盟聘問而無所證者雖使至告喪其名亦不可得而知矣凡此類因舊史而不革者也諸侯曰薨大夫曰卒五等邦君何以書卒夫子作春秋

則有革而不因者周室東遷諸侯放恣專享其國而  
上不請命聖人奉天討以正王法則有貶黜之刑矣  
因其告喪特書曰卒不與其為諸侯也故曰  
知我者其惟春秋乎罪我者其惟春秋乎  
音註相

亮反

冬十有二月齊侯鄭伯盟于石門音註

石門齊地此特  
相盟之始書石

門以志諸侯之合書鹹以志諸侯  
之散見春秋之終始齊鄭為之也

外盟會常事也何以書在春秋之亂世常事也於聖  
人之王法則非常也有虞氏未施信於民而民信夏  
后氏未施敬於民而民敬殷人作誓而民始畔周人  
作會而民始疑子曰大道之行與三代之英丘未之  
逮也而有志焉諸侯會盟來告則書而弗削者其諸  
以是為非常典而有志於天下為公之世乎故凡書

盟者惡之也

# 癸未葬宋穆公

外諸侯葬其事則因魯會而書其義則聖人或存或削曷為或存或削春秋天子之事也傳稱諸侯五月而葬同盟至同盟謂同方嶽之盟者其生講會同之好其沒有葬送之禮是諸侯所以睦鄰國也按周制有職喪掌諸侯之喪禮涖其禁令序其事凡諸侯及諸臣葬於墓者則冢人授之兆為之蹕而均其禁是王者所以懷諸侯也外諸侯葬或存或削而交鄰國待諸侯之義見矣葬而或日或不日者何備則書日畧則書時其大致然也卒而或葬或不葬者何有怠於禮而不葬者有弱其君而不葬者有討其賊而不葬者有諱其辱而不葬者有治其罪而不葬者有避其號而不葬者宋殤齊昭告亂書弑矣而經不書葬

是討其賊而不葬者也晉主夏盟在景公時告喪書日矣而經不書葬是諱其辱而不葬者也魯宋盟會未嘗不同而三世不葬是治其罪而不葬者也吳楚之君書卒者十亦有親送於西門之外者矣而經不書葬是避其號而不葬者也怠於禮而不往弱其君而不會無其事闕其文魯史之舊也討其賊而不葬諱其辱而不葬治其罪而不葬避其號而不葬聖人所削春秋之法也故曰知我者其惟春秋乎罪我者其惟春秋乎

春秋傳卷一



春秋傳卷二

宋 胡安國 撰

隱公中

壬桓王四年齊僖十二晉鄂五衛桓十六弑蔡宣三十

戌元年一鄭莊二十五曹桓三十八陳桓二十六

杞武三十二宋殤公與夷元

年秦文四十七楚武二十二

春王二月莒人伐杞取牟婁音註

牟婁杞邑此伐國取邑之始杞音起

取者收奪之名牟婁杞邑也聲罪伐人而強奪其土  
故特書曰取以著其惡或曰諸侯土地土上受之天王  
下傳之先祖所以守宗廟之典籍也聖王不作諸侯  
放恣強者多兼數圻弱者日以侵削當是時有取其

故地者夫豈不可然僖公嘗取濟西田矣成公嘗取汶陽田矣亦書曰取何也苟不請於天王以正疆理而擅兵爭奪雖取本邑與奪人之有者無以異春秋之義不以亂易亂故亦書曰取正其本之意也上二年莒人擅興入向而天討不加焉至是伐國取邑其暴益肆矣

**音註**

圻音祈  
汶音問

戊申衛州吁弑其君完

**音註**  
臣稱臣弑君之罪也

此衛公子州吁也而削其屬籍特以國氏者罪莊公不待之以公子之道使預聞政事主兵權而當國也以公子之道待州吁教以義方弗納於邪不以賤妨貴少陵長則桓公之位定矣亂何由作州吁有寵好兵而公弗禁石碯盡言極諫而公弗從是不待以公子之道使預聞政事主兵權而當國也春秋之旨在於端本清源以衛詩綠衣諸篇考之所謂前有範而不見後有賊而不知者莊公是也其不稱公子而以

國氏著後世為人君父者之戒爾故傳有之曰音註

盡子  
忍反

夏公及宋公遇于清音註

清衛邑此特  
相遇之始

遇者草次之期古有遇禮不期而會以明造次亦有  
恭肅之心春秋書遇私為之約自比於不期而遇者  
直欲簡其禮爾簡畧慢易無國君之禮則莫適主矣  
故志內之遇者四而皆書及若曰以此及彼然也志  
外之遇者三而皆以爵若曰以尊及卑然也其意以  
為莫適主者異於古之不期而會矣故凡書遇者皆  
惡其無人君音註適丁  
相見之禮也歷反

宋公

陽

陳侯

桓

蔡人

宣

衛人

吁

伐鄭

音註

此諸侯會伐

之始亦東諸

諸

侯分黨之始於是齊鄭一黨也魯宋陳蔡衛一黨也東諸侯分黨而天下始多故矣

春秋之法誅首惡興是役者首謀在衛而以宋主兵何也前書州吁弑君其罪已極至是阻兵修怨勿論可也而鄰境諸侯聞衛之有大變也可但已乎陳恒弑簡公孔子沐浴而朝告於哀公請討之公曰告夫三子者子曰以吾從大夫之後不敢不告也之三子告不可子曰以吾從大夫之後不敢不告也然則鄰有弑逆聲罪赴討雖先發而後聞可矣宋殤不恤衛有弑君之難欲定州吁而從其邪說是肆人欲滅天理非人之所為也故以宋公為首諸國為從示誅亂臣討賊子必先治其黨與之法也此義行為惡者孤矣故曰春秋成音註從才而亂臣賊子懼音註用反

秋鞏帥師音註

此大夫專將之始鞏音揮

按左氏諸侯謀伐鄭宋公使來乞師公辭之羽父請以師會之公弗許固請而行易曰履霜堅冰至履霜陰始凝也馴致其道至堅冰也臣弑其君子弑其父非一朝一夕之故其所由來者漸矣由辯之不早辯也宋人來乞師而公辭之羽父請以師會而公弗許其辭而弗許義也輦以不義強其君固請而行無君之心兆矣夫公子公孫升為貴戚之卿者其植根膠固難御於異姓之卿况輦已使主兵而方命乎隱公不能辯之於早罷其兵權猶使之帥師也是以及鍾巫之禍春秋於此去其公子以謹履霜之戒

## 會宋公陳侯蔡人衛人伐鄭

春秋立義至精詞極簡嚴而不贅也若曰輦帥師會伐鄭豈不白乎再序四國何其詞費不憚煩也言之重詞之複其中必有大美惡焉四國合黨輦復會師同伐無罪之邦欲定弑君之賊惡之極也言之不足

而再言聖人之情見矣天地造物化工運其神春秋討賊聖筆寫其意再序四國而誅討亂臣之法嚴矣

九月衛人

石碣

殺州吁于濮音註

濮音卜陳地也

伐鄭稱人貢詞也殺州吁稱人衆詞也知然者伐鄭之役公孫文仲為主將而變文稱人則是指國人聽州吁號令從文仲而南行者也故曰責詞其殺州吁則石碣謀之而使右宰醜蒞也變又稱人則是人皆有欲討賊之心亦夫人之所得討也故曰衆詞公羊子曰稱人者何討賊之詞也其義足矣于濮者何衛國之人著諸侯之罪也衛人失賊而曰著諸侯之罪何也夫州吁二月試君而不能即討者緣四國連兵欲定其位故久然後能殺之于濮耳非諸侯之罪而何夫以討賊許衆人而以失賊罪鄰國與賊者寡矣故曰春秋成而亂臣賊子懼

音註

碣七畧反

冬十有二月衛人立晉音註

桓公弟宣公立

人衆詞立者不宜立也晉雖諸侯之子內不承國於先君上不稟命於天子衆謂宜立而遂自立焉可乎故春秋於衛人特書曰立所以著擅置其君之罪於晉絕其公子所以明專有其國之非以此垂法而父子君臣之義明矣未有為子而不受之父也未有為諸侯而不受之王也

癸桓王五年齊僖十三晉鄂六奔衛宣公晉元年蔡宣亥二年三十二鄆莊二十六曹桓三十九陳桓二

十七杞武三十三宋賜二秦文四十八楚武二十三

春公觀魚于棠音註

棠魯地

齊景公問於晏子吾欲觀於轉附朝舞遵海而南放於琅琊吾何修而可以比於先王觀也對曰天子適

諸侯曰巡狩巡所守也諸侯朝於天子曰述職述所職也無非事者春省耕而補不足秋省斂而助不給是故諸侯非王事則不出非民事則不出今隱公慢棄國政遠事逸遊偪伯之忠言不見納亦已矣又從而為之辭是縱欲而不能自克之以禮音註放上也無鍾巫之及乎持書觀魚譏之也

# 夏四月葬衛桓公

衛亂是以緩魯往會故書聖人存而弗削者弒逆之賊討矣諡者行之迹所以紀實德垂勸戒也名之曰幽厲雖孝子慈孫百世不能改失位而見弒何以為桓列爵惟五皆王命也衛本侯爵何以稱公見臣子不請於王而私自諡爾程氏曰正終大事也必於正寢而不歿於婦人之手豈苟然乎死而加之不正之諡知忠孝者不忍為也春秋於邦君薨正以王法而書卒至於葬則從其私諡而稱公或革或因前以貶



不臣順之諸侯後以罪不忠孝之臣子詞顯而義微皆所以過人欲存天理大居正也

# 秋衛師入邠音註

邠小國音成

稱師者紀其用衆而立義不同有矜其盛而稱師者如齊師宋師曹師城邢之類是也有著其暴而稱師者楚滅陳蔡公子棄疾主兵而曰楚師之類是也有惡其無名不義而稱師者次于郎以俟陳蔡及齊圍邠之類是也衛宣繼州吁暴亂之後不施德政固本恤民而毒衆臨戎入人之國失君道矣書衛師入邠著其暴也

# 九月考仲子之宮音註

仲子桓母也

考者始成而祀也其稱仲子者惠公欲以愛妾為夫人隱公欲以庶弟為嫡子聖人以為諸侯不再娶於

禮無二適孟子入惠公之廟仲子無祭享之所為別立宮以祀之非禮也故因其來賁而正名之曰仲子之賁因其考宮而正名之曰仲子之宮而夫人衆妾之分定矣隱公攝讓之實辨矣桓公篡弑之罪昭矣存則以氏繫姓以姓繫號歿則以謚繫號以姓繫謚者夫人也存不稱號歿不稱謚單舉姓字者妾也凡宮廟非志災音註適音嫡失禮則不書音註為去聲

# 初獻六羽

初獻六羽者始用六佾也不謂之佾而曰羽者佾干羽之總稱也羽以象文德干以象武功婦人無武事則獨奏文樂故謂之羽而不曰佾也初者事之始魯僭天子之禮樂舊矣是成王過賜而伯禽受之非也用於太廟以祀周公已為非禮其後羣公皆僭用焉仲子以別宮故不敢同羣廟而降用六羽書初獻者

明前此用八之僭也諸侯僭於上大夫僭於下故其末流季氏八佾舞於庭而三家者以雍徹上下無復辨矣聖人因事而書所以正天下之大典

# 邾人鄭人伐宋

按左氏宋人取邾田邾人告于鄭曰請君釋憾于宋敝邑為道則主兵者邾也故雖附庸小國而序乎鄭之上凡班序上下以國之小大從禮之常也而盟會征伐以主者先因事之變也然則衛州吁告于宋以伐鄭事與此同而聖人以宋為主者何此春秋撥亂之大法也凡誅亂臣討賊子必深絕其黨

## 螟音註

螟音冥

蟲食苗心曰螟食葉曰螽食節曰賊食根曰螽國以民為本民以食為天詩去螟螽害稼也春秋書螟記

災也聖人是以為國之大事也故書而近世王安石  
乃稱為人牧者不必論秦災傷之事亦獨何哉甚矣  
其不講於聖人之經以欺音註孟侯反  
當年而誤天下與來世也去上聲

冬十有二月辛巳公子彊卒音註

彊若侯反魯大夫也書卒不書葬葬者臣

子之事非公家所及

按左氏臧僖伯卒公曰叔父有憾於寡人寡人弗敢  
忘葬之加一等以公羊三世考之則所傳聞之世也  
而書日見恩禮之厚明矣公將如棠觀魚者僖伯諫  
而不聽則稱疾不從可謂忠臣矣葬之加一等夫是  
之謂稱然隱公不敢忘其忠而不能聽其言與音註  
郭公善善而不能用於亡國一也其及宜矣  
稱去聲善善  
上善去聲

宋人伐鄭圍長葛音註

長葛鄭邑此書圍之始

圍者縶其城邑絕其往來之使禁其樵採之遠城守不下至於經年而不解誅亂臣討賊子可也長葛鄭邑何罪乎書圍於此而書取於後宋人之惡彰矣

甲桓王六年

奔僖十四晉哀侯光元年衛宣二蔡宣三子三年十三鄭莊二十七曹桓四十陳桓二十八

杞武三十四宋殤三秦文四十九楚武二十四

春鄭人來輸平音註

和而不盟曰平書輸平以志諸侯之合書及鄭平以志諸侯之散諸

侯合而天下始多故矣

輸者納也平者成也鄭人曷為納成於魯以利相結解怨釋仇離宋魯之黨也公之未立與鄭人戰于狐

壤止焉元年及宋盟于宿四年遇于清其秋會師伐鄭即宋魯為黨與鄭有舊怨明矣五年鄭人伐宋入其郭宋來告命魯欲救之使者失辭公怒而止其冬宋人伐鄭圍長葛鄭伯知其適有用間可乘之隙也是以來納成耳然則善之乎曰平者解怨釋仇固所善也輸平者以利相結則貶矣曷為知其相結之以利也後此鄭伯使宛來歸枋而魯入其地會鄭人伐宋得郛及防而魯又取其二邑是知輸平者以利相結乃貶之也諸侯修睦以蕃王室所主者義爾苟為以利使為人臣者懷利以事其君為人子者懷利以事其父為人弟者懷利以事其兄諸侯必曰何以利吾國大夫必曰何以利吾家士庶人必曰何以利吾身上下交征利不至於篡弑奪攘則不厭矣故特稱輸平以明有國者必正其義不謀其利社已國敗家之本也

夏五月辛酉公會齊侯盟于艾音註

艾齊地此齊魯交好之始

秋七月

四德備而後為乾故易曰乾元亨利貞一德不備則乾道熄矣四時具而後成歲故春秋雖無事首時過則書一時不具則歲功虧矣既書時又書月者時天時也月王月也書時又書月見天人之理合也易不云乎君子行此四德者故曰乾元亨利貞若夫上下異致天人殊觀聖學不傳而春秋之義隱矣

冬宋人取長葛

宋人恃強圍邑久役大眾取非所有其罪著矣在王朝不能施九伐之威在列國不能修連帥之職鄭人土地天子所命先祖所受不能保有而失之是上無天王下無方伯而鄭亦無君也宋人強取以王法言

不可勝誅以天理言不善之積著矣初穆公屬國於與夷使其子馮出居于鄭殤公既立忌馮而伐鄭不亦逆天理乎春秋序宋主兵以殤公之罪重也明年鄭人伐宋序邾為首以鄭伯之罪輕也至是宋又舉兵伐鄭而圍其邑肆行暴虐不善之積已著而不可解矣其見弑於亂臣豈一朝一夕之故哉凡此類皆直書於策按其行事而善惡之

**音註**

屬章欲反應去聲

應可考而知天理之不誣者也

乙桓王七年

齊僖十五晉哀二曲沃武公稱元年衛宣丑四年三蔡宣三十四鄭莊二十八曹桓四十一

陳桓二十九杞武三十五宋殤四秦文五十楚武二十五

# 春王三月叔姬歸于紀

叔姬伯姬之娣非夫人也則何以書古者諸侯一娶九女必格之同時者所以定名分室亂源也今叔姬



待年於宗國不與嫡俱行則非禮之常所以書也眉  
山蘇轍以謂書叔姬賢之也若賢不得書必貴而後  
書則是位不可以位而蔑德也小國無大夫至於接我則書  
是位不可以廢事也位不可以廢事而獨可以廢賢  
乎如叔姬不歸宗國而歸于鄆以全婦  
道賢可知矣賢而得書亦春秋之法也  
集傳十二卷  
鄆邑名音分

## 滕侯卒

滕侯書卒何以不葬怠於禮弱其君而不葬者滕侯  
宿男之類是已古者邦交有常制不以國之強弱而  
有謹慢也不以情之疎密而有厚薄也春秋之時則  
異於是晉北國也楚南邦也地非同盟而親往俟其  
葬滕鄰境也宿同盟也訃告雖及而魯不之恤豈非  
以其壤地褊小乎怠於禮而不往弱其君而不會無

其事而闕其文此魯史之舊也聖人無加損焉存其卒闕其葬義自見矣卒自外錄不卒非外也葬自內

錄不葬非內也

夏城中丘音註

中丘魯邑此書城之始

程氏曰為民立君所以養之也養民之道在愛民力民力足則生養遂教化行風俗美故為政以民力為重也春秋凡用民必書其所興作不時害義固為罪矣雖時且義亦書見勞民為重事也人君而如此義則知慎重於用民力矣凡書城者完舊也書築者創始也城中丘使民不以時非人君之心也

齊侯使其弟年來聘音註

此齊聘之始

兄弟先公之子不稱公子貶也書盟書帥師而稱兄弟者罪其有寵愛之私書出奔書歸而稱兄弟者責

其薄友恭之義致於事而春秋之情可見矣年者齊  
僖公母弟也程氏謂先儒說母弟者蓋緣禮有立嫡  
子同母弟之文其曰同母蓋為嫡耳非以為加親也  
此義不明久矣僖公私於同母寵愛異於他弟施及  
其子猶與嫡等而襄公絀之遂成篡弑之禍故聖人  
於年來聘特變文書弟以示貶焉鄭語來盟黑肩帥  
師皆罪其私也書云于弟弗念天顯乃弗克恭厥兄  
兄亦不念鞠子哀大不友于弟天惟與我民彝大泯  
亂陳光奔楚而稱弟不念鞠子哀矣盜殺衛瓘而稱  
兄其亦不念天顯矣秦鍼宋辰皆責其薄也仁人於  
兄弟絕偏繫之私篤友恭之義人倫正而  
天理存其春秋以訓天下與來世之意也

# 秋公伐邾音註

此伐邾之始

奉詞致討曰伐按左氏公伐邾為宋討也宋人先取  
邾田故邾人入其郛魯與儀父則元年盟于昧矣邾

人何罪可聲持託為詞說以伐之爾經之書伐非主  
兵者皆有言可執見伐者皆有罪可討也傳曰欲加  
之罪何患無詞魯為宋討非義甚矣而稱伐邾所謂  
欲加之罪者也而不知渝昧之盟不待貶而自見矣

音註

昧音  
蔑

冬天王使凡伯來聘音註

凡伯周卿士凡本作  
汎音凡此周聘之始

戎伐凡伯于楚丘以歸音註

楚丘衛地此  
戎患之始

國而曰伐此一人而曰伐見其以徒衆也楚丘衛地  
以歸易辭也于楚丘者罪衛不救王臣之患以歸者  
罪凡伯失節不能死於位也周之秩官敵國賓至關  
尹以告候人為導司徒具徒司寇詰姦佃人積薪火  
師監燎其貴國之宥至則以班加一等益虔至於王  
吏則以官正位事今凡伯承王命以為過宥於衛而

我得伐之以歸是蔑先王之官而無君父也故旄丘  
錄於國風見衛不能修方伯之職也戎伐凡伯于楚  
丘以歸見衛不救王臣之  
患也為狄所滅則有由矣

春秋傳卷二

春秋傳卷三

宋 胡安國 撰

隱公下

丙桓王八年

齊僖十六晉哀三蔡宣三十五卒衛宣四  
鄭莊二十九曹桓四十二陳桓三十杞武

三十六宋殤五秦寧  
公元年楚武二十六

春宋公衛侯遇于垂音註

垂衛地特相遇不書書  
宋衛將以為參盟也

三月鄭伯使宛來歸祊音註

宛鄭大夫也音宛祊  
鄭祀泰山之邑音崩

庚寅我入祊

鄭伯欲以泰山之祊易許田前此來輸平者以言請之矣未入地也至是來歸祊者其地既輸矣未易許也周制六年五服一朝故於天子之郊有朝宿之地又六年王乃時巡諸侯各朝于方嶽故於泰山之旁有湯沐之邑諸侯於王畿之內方嶽之下皆有是乎成王以周公有大勳勞故特賜之許田為朝宿之地如皆有焉盡天子之郊不足為其地矣宣王以鄭伯母弟懿親故特賜之祊田為湯沐之邑如皆有焉盡泰山之旁不足為其邑矣祊近於魯許鄰於鄭各以其近者相易何以不可乎用是見鄭有無君之心而謂天王不復能巡符矣用是見鄭有無親之心而敢與人以先祖所受之邑矣其言我入祊者祊非我有也入者不順之詞義不可而強入之也

夏六月己亥蔡侯考父卒音註

宣公卒桓侯封人立



# 辛亥宿男卒

天王崩告於諸侯則不名諸侯薨以名赴而自別於大上禮也古者死而不諡不以名為諱周人以諡易名於是乎有諱禮故君薨赴於他國則曰寡君不祿敢告執事春秋之時遵用此禮凡赴者皆不以名矣經書其終雖五霸強國齊桓晉文之盛莫不以名者是仲尼筆之也赴不以名而書其名者與魯通也已通而不名者舊史失之耳未通而名者有所證矣故傳此義者記於禮篇曰諸侯不生名夫生則不名死則名之別於大上示君臣尊卑之等蓋禮之中也諸侯薨赴不以名而仲尼革之必以名書變周制矣春秋魯史聖人修之也而孟子謂之作以此類也

秋七月庚午宋公齊侯衛侯盟于瓦屋音註

瓦屋周地此參盟之

始有參盟然  
後有主盟也

程氏曰宋為主盟與鄭絕也大道隱而家天下然後有誥誓忠信薄而人心疑然後有誼盟盟誼煩而約  
酬亂然後有交質子至是傾危之俗成民不立矣春  
秋革薄從忠於參盟書曰謹其始也周官設司盟掌  
盟載之法凡邦國有疑則請盟於會同聽命於天子  
亦聖人待衰世之意爾德又下衰諸侯放恣其屢盟  
也不待會同其私約也不繇天子口血未乾而渝盟  
者有矣其末至於交質子猶有不信者焉春秋謹參  
盟善胥命美蕭魚之會以信待人而不疑也蓋  
有志於天下為公之世凡此類亦變周制矣

音註

約於妙反質音置  
繇音由乾音干

八月葬蔡宣公

九月辛卯公及莒人盟于浮來音註

浮來莒邑此好莒之始魯君特會外

大夫始此

莒小國人微者而公與之盟故特言及以譏失禮且明非大夫之罪也易曰謙尊而光卑而不可踰隱公可謂謙矣何以譏之為失禮曰謙亨君子以裒多益寡稱物平施屈下與小國之大夫盟宜稱物平施之謂乎太卑音註哀蒲侯反稱尺而可踰非謙德矣證反施始敢反

螟

冬十有二月無駭卒音註

公不與小故故不書日卒而後賜族故不書氏

無駭書名未賜族也諸侯之子為大夫則稱公子其孫也而為大夫則稱公孫公孫之子與異姓之臣未

賜族而身為大夫則稱名無駭俠之類是也已賜族而使之世為大夫則稱族如仲孫叔孫季孫之類是也古者置卿必求賢德不以世官春秋之初猶為近古故無駭與俠皆書名耳其後官人以世無不賜之族或以字或以謚或以官或以邑而先王之禮亡矣至於三家專魯六卿分晉諸侯失國出奔者相繼職此由也按禮天子冢內諸侯世其祿而不嗣然則諸侯所置大夫嗣其位而不易豈禮也哉觀春秋所書而是非之迹著矣

音註

襄音縣

丁桓王九年齊僖十七晉哀四衛宣五蔡桓侯封人元  
卯六年九年鄭莊三十曹桓四十三陳桓三十一杞  
武三十七宋殤六秦  
寧二楚武二十七

春天王使南季來聘音註

南季天子大夫也

按周禮行人王者待諸侯有時聘以結好問問以諭  
志而穀梁子何以獨言聘諸侯非正也古者諸侯於  
天子比年一小聘三年一大聘五年一朝天子於諸  
侯不可以若是忽故亦有聘問之禮焉隱公即位九  
年於此而史策不書遣使如周則是未嘗聘也亦不  
書公如京師則是未嘗朝也一不朝則貶其爵再不  
朝則削其地如隱公者貶爵削地可也刑則不舉遣  
使聘焉其斯以為不正乎經書公如京師者一朝于  
王所者二卿大夫如京師者五舉魯一國則天下諸  
侯怠慢不臣可知矣書天王來聘者七錫命者三歸  
賑者一賄葬者四則問於他邦及齊晉秦楚之大國  
又可知矣王之不王如此征伐安得不自諸侯出乎  
諸侯之不臣如此政事安得不自大夫出乎君臣上  
下之分易矣陪臣執國命夷狄制諸夏矣其原皆自  
天王失威福之柄也春秋  
於此蓋有不得已焉爾矣

音註

恕苦  
八反

三月癸酉大雨震電庚辰大雨雪音註

雨于付反

震電者陽精之發雨雪者陰氣之凝周三月夏之正月也雷未可以出電未可以見而大震電此陽失節也雷已出電已見則雪不當復降而大雨雪此陰氣縱也夫陰陽運動有常而無忒凡失其度人為感之也今陽失節而陰氣縱公子翬之說兆矣鍾巫之難萌矣春秋災異必書雖不言其事應而事應具存惟明於天人相感之際響應之理則見聖人所書之意矣

俠卒音註

俠魯大夫未賜族者音叶

夏城卽音註

卽魯邑

城者禦暴保民之所而城有制役有時大都不過三國之一邑無百雉之城制也魯嘗城費城郕其後復

墮焉則越禮而非制矣凡土功龍見而戒事火見而制用水昏正而裁日至而畢時也隱公城中丘城卽而皆以夏則妨農務而非時矣城不踰制役不皇時又當分財用平板餘稱畚築程土物議遠邇畧基址揣厚薄仞溝血具餘糧度有司量功命日不愆于素然後為之可也凡失其時制妄興大作無愛養斯民之意者其罪

**音註**

費音秘墮許規反裁才代反又音再畚布衮反

## 秋七月

## 冬公會齊侯于防音註

防宋地明年魯取之

周官行人曰時會以發四方之禁此謂非時而合諸侯以禁止天下之不義也列國何為有此名凡書會皆譏也謂非王事相會聚爾左傳稱宋公不王鄭伯以王命討之使來告命會于防謀伐宋也于中丘為

師期也亦謂之非王事可乎曰以王命討宋而聽征討之禁於王都雖召陵之舉不是及矣始則私相會為謀于防中則私相盟為師期于鄧終則乘波人而深為利以取二邑歸諸已奉王命討不庭者果如是乎經之書會書伐音註召音邵而不異其文以此

戊桓王十年齊僖十八晉哀五衛宣六蔡桓二鄭莊三  
辰七年十一曹桓四十四陳桓三十二杞武三十

八宋殤七秦寧  
三楚武二十八

春王二月公會齊侯鄭伯于中丘

夏輦帥師會齊人鄭人伐宋

輦不氏先期也始而會宋以伐鄭固請而行今而會鄭以伐宋先期而往不待鍾巫之變知其有無君之



心矣夫亂臣賊子積其強惡非一朝一夕之故及權勢已成威行中外雖欲制之其將能乎故去其公子以戒兵柄下移制之於未亂也

六月壬戌公敗宋師于管音註

齊鄭後期故公獨敗宋師書敗宋未陳也管宋

地古  
頑反

辛未取郕辛巳取防音註

郕防宋二邑鄭入之以歸于我也鄭取郕防歸于我不書

鄭譏不在鄭晉取濟西汶陽郕田歸于我不書晉譏不在晉也郕音告

內大惡其辭婉小惡直書而不隱夫諸侯分邑非其有而取之盜也曷不隱乎於取之中猶有重焉者若成公取郕襄公取郕昭公取郕皆覆人之邦而絕其嗣亦書曰取所謂猶有重焉者此也故取郕取防直

書而不隱也其不言戰而言敗敗之者為主  
彼與戰而此敗之也皆陳曰戰詐戰曰敗

音註

陳音

# 秋宋人衛人入鄭

宋人

殤

蔡人

宣

衛人

宣

伐戴鄭

伯伐取之

音註

戴小

國

小

稱伐稱取兼之也或疑鄭人兵力不能取戴兼三國  
之師非矣什圍伍攻正也以寡覆衆奇也莊公益嘗  
克叔段敗王師困州吁而入許能以奇勝可知矣故  
駐師於郊多方以誤之也四國已闕起乘其弊一舉  
而兼取之下莊子之術也然則可乎孟子曰善戰者  
服上刑稱伐取者其以鄭莊公殘民之甚當此刑矣

音註

卞莊子魯  
卞邑大夫

冬十月壬午齊人鄭人入邲音註

邲小國

左氏傳云宋公不王鄭伯以王命致討而邲人不會齊鄭入邲討違王命也程氏謂宋本以公子馮在鄭故二國交惡春秋不見其為王討也王臣不行王師不出矯假以逞私忿耳此說據經為合若討違王命則不書入矣入者不順之詞也苟以為難詞則齊鄭大國於討邲何難哉

已桓王十有一年

齊僖十九晉哀六衛宣七蔡桓三鄭莊三十二曹桓四十五陳桓三十三

杞武三十九宋殤八

秦寧四楚武二十九

音註 千寶曰十盈則更始以奇從盈數故曰有

春滕侯薛侯來朝音註

此諸侯朝魯之始亦旅見之始

諸侯朝於諸侯禮乎孔子曰邦君為兩君之好有反玷周禮行人凡諸侯之邦交殷相聘世相朝也然謂

之殷則得中而不過謂之世則終諸侯之世而一相  
朝其為禮亦節矣周衰典禮大壞諸侯放恣無禮義  
之交惟強弱之視以魯事觀焉或來朝而不報其禮  
或屢往而不納以歸無合於中聘世朝之制矣且列  
國於天子述所職者蓋闕如也而自相朝聘可乎凡  
大國來聘小國來朝一切書而不削皆所以示譏滕  
薛二君不特言者又譏旅見也非天子不旅見  
諸侯偃然受之而不辭亦以見隱公之志荒矣  
**音註**  
好去聲站  
丁念反

夏公會鄭伯于時來

**音註**  
時來  
鄭地

秋七月壬午公及齊侯鄭伯入許

書會則伐許者本鄭志也書及則入許者公所欲也  
隱公即位十有一年天王遣使來聘者再而未嘗朝

于京師罪一也平王崩不奔喪會葬致使武氏子來  
求賻罪二也禮樂征伐自天子出而擅興兵甲為宋  
而伐邾為鄭而伐宋罪三也山川土田各有封守上  
受之天王下傳之先祖而取郕及防入祊易許罪四  
也今又入人之國而逐其君罪五也凡此五不韙者  
人臣之大惡而隱公兼有之然則不善之殃豈特始  
於惠成於桓而隱之積亦不可得而揜矣使隱公者  
為國以禮而自強於善豈有鍾巫之難乎是故春秋  
所載以人事言則是非善惡之迹設施於前而成敗  
吉凶之效見於後以天道言則感應之理明矣不可  
不察也

音註

韙音  
偉

# 冬十有一月壬辰公薨

致隱讓國立不以正惠公之罪也致桓弑君幾不早  
斷隱公之失也既有讒人交亂其間憂虞之象著矣

而曰使營菟裘吾將老焉是猶豫留時辨之弗早辨也其及也宜隱公見弑魯史舊文必以實書其曰公薨者仲尼親筆也古者史官以直為職而不諱國惡仲尼筆削舊史斷自聖心於魯君見弑削而不書者蓋國史一官之守春秋萬世之法其用固不同矣不書弑示臣子於君父有隱避其惡之禮不書地示臣子於君父有不沒其實之忠不書葬示臣子於君父有討賊復讎之義非聖人莫能修謂此類也夫賊不討雖不復而不書葬則服不除寢苦枕戈無時而終事也以此法討賊至嚴矣故曰春秋成而亂臣賊子

懼  
音註

苦始  
占反

右隱公十有一年書于經者其事七十有六以為經世之典撥亂反正之書百王不易之大法其詳可得聞乎謂一為元則知祖述憲章以體元為人主之職謂周正為春則知立制度改正朔以夏正

為可行之時謂正月為王正則知天下之定于一也隱公不書即位則知父子君臣之大倫不可廢也與邾儀父宋人盟而皆書曰及則知以忠信誠怒為先而盟誓不足責也大叔出奔共而書曰鄭伯克段則知以親愛為主而思義之輕重不可偏也來賈仲子而冢宰書名則知夫婦人倫之本而嫡妾之名分不可亂也祭伯朝魯直書曰來則知人臣義無私交而朋黨之原不可長也公子益師書卒則知春秋貴大臣而恩禮之哀榮不可恕也元者何仁是也仁者何心是也建立萬法酬酢萬事帥馭萬夫統理萬國皆此心之用也堯舜禹以天下相授堯所以命舜舜亦以命禹首曰人心惟危道心惟微周公稱乃考文王惟克厥宅心乃克立茲常事故一心定而萬物服矣春之為夏正何也夫斗指寅然後謂之春建巳然後謂之夏故易曰兌正秋也以兌為正秋則坎為正冬必矣今以

冬為春則四時易其位春秋正名之書豈其若是哉故程氏謂周正月非春也假天時以立義耳商人以建丑革夏正而不能行之於周周人以建子革商正而不能行之於秦秦人以建亥為正固不可行矣自漢世改用夏時經歷千載以至于今卒不能易謂為百王不易之大法指此一事可知矣仲尼豈以欺後世哉王正月之定于一何也天無二日土無二王家無二主尊無二上道無二致政無二門故議常經者黜百家尊孔氏諸不在六藝之科者勿使並進此道術之歸于一也言致理者欲令政事皆出中書而變禮樂革制度則流放竄殛之刑隨其後此國政之歸于一也若乃闢私門廢公道各以便宜行事是人自為政謬於春秋大一統之義矣盟于昧而書及公所欲也盟于宿而書及公立而求成焉非若小國之於大國不得已而要盟者後七年為宋而伐邾昧之盟其刑牲較



血果何為也後十年為鄭而伐宋宿之盟要質鬼神又安在乎比事以觀而盟不足貴亦審矣世衰道隱民彞泯亂若宋殤之於馮也衛侯鄭之於叔武取也皆為利爭不勝計也而莊公獨以順母為辭養成段惡夫中也養不中才也養不才故人樂有賢父兄也仁人之於兄弟不藏怒焉不宿怨焉親愛之而已矣象憂亦憂象喜亦喜恩掩義也使吏治其國而象不得有為義勝恩也恩義並立而中持衡焉段雖凶逆焉攸亂此春秋責莊公之意也太宰建邦六典以佐王治邦國者也而承命以賄諸侯之妾不知其不可是為不智知其不可而不言是為不忠不忠不智之人而可以居百僚之長乎故貶而書名賤之也或曰安知咥之不言如其不用何言而不用則辭其位而不居禮也今奉命而來則知其阿諛順旨無體國愛君之義矣其貶而書名非宰也夫危而不持顛而不扶則將焉

用彼相若以其嘗為冢宰不論功罪而曲以禮貌加之非春秋責相之意矣君子有更相汲引交好以為公小人有互相朋黨比周以為私其迹雖同而情異不可不察也祭伯朝魯安知其為私而不與乎隱公之立未嘗請命王法所當治也祭伯為王卿士不能詔王以正典刑而遠來朝之其為阿私審矣故尹氏來訃不稱爵祭叔來聘不言使皆以明人臣之義杜朋黨之原耳大夫書卒見君臣之義也不書葬明尊卑之等也或日或不日著禮貌之差也名而不書氏者身自為卿而非世也其稱公子以貴戚故使為卿也不書官者不請於王而自命也其有將兵而會戰奉使而出疆名姓已登於史冊如公子翬者而不書卒何也迷國誤朝躬行弑逆則有天討之刑矣公子遂之罪亦同而書卒何也因事之變以明卿卒不繹之禮而義不繫於遂也季孫意如無事之變而書卒獨何歟春

秋有變例定哀多微辭季氏逐昭公殺務人而立  
宋若有漢高帝之公不賞私勞則三家退聽公室  
張矣定公幸於禍而忘其讎誘於利而忘其辱以  
意如為大夫而不討先君之賊也天理滅矣是故  
比事以觀其異同可見觸類而長其指意無窮以  
一年之事考之則二百四十二年之行事皆可見  
矣以為經世之典撥亂反正之音註務人即公為  
書百王不易之大法豈不信夫昭公太子

春秋傳卷三



覆校官檢討臣季學錦  
校對官修撰臣張書勲

謄錄監生臣朱溥

謄錄監生臣徐大豐